

輿地紀勝

四

宋元地理志叢刊

(宋)王象之・撰

李勇先・校點

四川大學出版社



輿地紀勝

四

宋元地理志叢刊

(宋)王象之·撰

李勇先·校點



四川大學出版社

責任編輯：莊 劍 徐聞文 熊 志
責任校對：王大用 洪 滔 杜 偉 李文傑
責任印制：楊麗賢

圖書在版編目(CIP)數據

輿地紀勝校點 / (宋) 王象之原著；李勇先校點.
成都：四川大學出版社，2005.10
(宋元地理志叢刊)
ISBN 7-5614-3250-X

I. 輿... II. ①王... ②李... III. 歷史地理－中國－宋代 IV. K928.644

中國版本圖書館 CIP 數據核字 (2005) 第 111031 號

書名 輿 地 紀 勝

作 者	[宋]王象之 原著 李勇先 校點
出 版	四川大學出版社
地 址	成都市一環路南一段 24 號 (610065)
發 行	四川大學出版社
印 刷	成都東江印務有限公司
成品尺寸	140 mm×202 mm
印 張	212.625
字 數	4100 千字
版 次	2005 年 10 月第 1 版
印 次	2005 年 10 月第 1 次印刷
定 價	980.00 圓(全十冊)

◆讀者郵購本書，請與本社發行科
聯系。電話：85408408/85401670/
85408023 郵政編碼：610065
◆本社圖書如有印裝質量問題，請
寄回出版社調換。

版權所有◆侵權必究

◆網址：www.scupress.com.cn

輿地紀勝卷第三十九

楚州

山陽 淮陰 射陽 寶應

【州沿革】

楚州，繫。山陽郡，團練。《九域志》。淮南東路安撫使，山東制置使，淮南七郡及山東諸郡皆屬焉。近制。《禹貢》揚州之域。《元和郡縣志》。天文，上當星紀，在牽牛之分。自漢至晉爲臨淮、廣陵之地。《晉·天文志》：「臨淮入牛四度，廣陵入牛八度。」春秋時屬吳。《吳越春秋》云：「吳將伐齊，自廣陵掘江通淮。」是也。又《左傳》：「哀公九年，吳城邗，溝通江淮。」杜預注云：「今廣陵邗江是也。」後越滅吳，其地入越。《史記·楚世家》曰：「越已滅吳，而不能正江淮北。楚乃東侵地，至泗上。」象之謹按：楚州在泗水之東，楚侵止于泗上，則泗水之東當屬越。戰國時楚敗越，盡取吳故地。《通鑑》載在顯王三十五年。

秦滅楚，屬九江郡。《輿地廣記》秦九江郡下有楚州。西漢屬臨淮郡及廣陵國。《西漢志》臨淮郡下有射陽、鹽漬、淮陰三縣，廣陵國下有平安縣。平安，即今之寶應也。東漢屬廣陵郡及下邳國。《東漢志》廣陵郡下有平安、鹽漬、射陽三縣，下邳國下有淮陰縣。三國屬魏。按三國鄧艾屯田于石鼃，今有石鼃故城，則其地當屬魏。自魏至西晉，俱爲臨淮、廣陵二郡之地。《寰宇記》及《晉志》廣陵郡治淮陰，有淮陰、射陽、鹽漬三縣，而無平安縣。東晉祖逖北討，屯淮陰。《通鑑》在元帝建興元年。後以劉隗鎮淮陰。《通鑑》在元帝太興四年。庾希自下邳退屯于山陽。《通鑑》在哀帝興甯元年。謝元自彭城退屯于淮陰。《通鑑》在太元十二年。又分淮北爲北徐州，南爲徐州，分廣陵置山陽郡。《晉志》在義熙七年。又僑立兖州。《寰宇記》在義熙八年。宋因晉，以山陽爲重鎮。《通典》魏太武南寇山陽，太守蕭僧珍蓄陂水令滿，須魏人至，決以灌之。魏主自瓜步退，過山陽，而不敢攻。《通鑑》在元嘉二十八年。宋孝武帝封弟休祐爲山陽王。此據《元和郡縣志》。又按《通鑑》：「宋明帝泰始二年，以山陽王休祐爲豫州刺史。」自宋始失淮北〔二〕，乃於此立州鎮。《南齊志》北兖州下載荀羨《北征議》。蕭道成鎮淮陰，後爲北兖州。《通鑑》在宋明帝泰始三年。齊亦以北兖州爲重鎮。梁初得之，尋入東魏，爲山陽郡。《通典》及《寰宇記》。

陳吳明徹復江北，山陽、淮陰城降。《通鑑》陳宣帝太建五年。周韋孝寬伐淮南，而山陽等九郡民並自拔還江南。《通鑑》在陳宣帝太建十一年。隋初，廢郡爲楚州。《隋志》云：「舊置山陽郡，開皇初郡廢，十二年置楚州。」煬帝時州廢，併入山陽，屬江都郡。《寰宇記》。唐初爲臧君相所據，曰東楚州，尋歸于唐。《唐志》在武德四年。廢西楚州，以盱眙來屬，改東楚州曰楚州。《唐志》在武德八年。改淮陰郡。天寶元年。復爲楚州。乾元元年。後唐升順化軍。天成三年。周世宗征淮南，拔楚州。《通鑑》在顯德五年。降爲防禦州。《寰宇記》。皇朝爲團練州。《九域志》在太平興國四年。中興爲楚、泗鎮撫使，《中興小曆》在建炎四年，以命趙立。尋罷。《小曆》。今爲淮東安撫司兼山東制置使。今制。今領縣四，治山陽。《新山陽志》云：「國初楚縣四，曰山陽、寶應、淮陰、盱眙。乾德元年，盱眙屬泗州，領縣三。開寶九年，以泰州鹽城還楚，復領四。熙寧五年，以漣水來屬，共領縣五。建炎初，漣水陞軍，割鹽城爲屬縣，又領縣三。未幾復舊。紹興十一年，漣水屬淮北。今復領四，治山陽。」

【縣沿革】

山陽縣 望

倚郭。《元和郡縣志》云：「本漢射陽縣地。」《通典》云：「吳王濞反於廣陵，山陽王率衆於此拒之」，因以「山陽」爲名。」《西漢志》屬臨淮郡。應劭注曰：「在射水之陽，故曰射陽。」《漢表》：「高祖封項纏爲射陽侯」，即此。」王莽改爲臨淮亭。《後漢志》屬廣陵郡。《晉志》有射陽縣。又云義熙七年置山陽郡〔四〕。《元和郡縣志》云：「晉立山陽縣〔五〕。」《寰宇記》云：「以境內有地名山陽，因以名郡、縣。」《南齊志》臨淮郡下有射陽縣。《隋志》云：「隋開皇十二年置楚州，山陽縣隸焉。」唐初，臧君相據之，爲東楚州。《唐志》云：「武德四年爲東楚州，治於此。八年，去『東』字，復爲楚州。」皇朝因之。

寶應縣 緊

在州南八十里。本漢平安縣。二《漢志》並屬廣陵郡。《舊唐志》云：「本漢平安縣，屬廣陵國。」《元和郡縣志》云：「本漢平安縣故地，後爲安宜縣。」《隋志》江都郡有安宜縣。《隋志》又云：「梁置陽平郡。」又：「東莞郡〔六〕，開皇初郡廢，又廢石鰲縣入焉。」《唐志》云：「本安宜。武德四年，以縣置倉州。七年，州廢，來屬。上元三年〔七〕，以獲定國寶十三枚，仍更安宜縣爲寶應縣。」

鹽城縣 緊

在州東二百四十里。《西漢志》：「爲鹽瀆縣，屬臨淮郡。」《東漢志》云：「鹽瀆縣，屬廣陵郡。」《舊唐志》：「鹽瀆縣，屬臨淮郡。」不同。《晉志》廣陵郡下仍有鹽瀆縣。《元和郡縣志》云：「晉安帝時，更名鹽城縣。」《輿地廣記》云：「宋因之。」《隋志》江都郡有鹽城，注云：「後齊置射州及射陽〔八〕、新城、安樂三縣。」武德四年來歸。七年州廢，省射陽、安樂、新安三縣置鹽城縣，仍屬楚州。《寰宇記》云：「南唐屬泰州。」《國朝會要》云：「開寶九年自泰州來隸〔九〕。紹興元年，撥隸漣水軍，三年還隸楚州。」

淮陰縣 中

在州西四十里。秦爲淮陽縣。《西漢志》屬臨淮郡。王莽改曰嘉信。《後漢志》屬下邳國。《晉志》爲廣陵郡治。東晉劉隗、謝安皆屯於此，始爲重鎮。《宋志》云：「宋以淮陰爲北兗州。」《元和郡縣志》云：「尋廢。」《南齊志》臨淮郡下有淮陰縣。《隋志》云：「後魏有淮陰郡。東魏改爲淮州。北齊時置懷恩縣。後周改曰壽張。隋開皇初。改縣曰淮陰。大業初廢，併縣入焉。」《唐志》云：「武德七年省。」

韓信寄食處。《東漢志》（一九）：「淮陰縣下南昌亭」注云：「——」。東晉爲重鎮。《廣陵記》云（二〇）：「——」，元帝使劉隗守淮陰」是也。唐鹽課四十五萬石。《元和郡縣志》云：「今官中置鹽監以收其利（二一），每歲煮鹽四十五萬石。」《圖經》尚二十五萬石。上帝賜寶，以鎮中國。唐肅宗寶應元年，楚州安宜縣尼真如恍惚登天（二二），見上帝賜以寶玉十三枚，云：「中國有災，以此鎮之。」因改元寶應，以安宜縣爲寶應縣（二三）。後鄭輅爲刺史，撰《得寶記》。屯田于東陽之石鼈。《荀羨傳》云：「北鎮淮陰（二四），——」。按石鼈在寶應縣（二五）。兩淮轉運使舊置司楚州。《無爲志》云：「淮漕使副舊置司楚州，中興始分儀真、無爲。」淮南控扼之地。《繫年錄》：「左正言吳表臣言：「楚州實淮南控扼之地。趙立乃陛下封疆之臣。」」揚（二六）、楚最曰要衝。《長編》云：「太宗朝王化基《澄清略》云：「江、淮諸郡，——」，水陸兩途，咽喉數國，務穰事衆，地廣民繁。」」山陽俯臨淮海，實南北必爭之地，我得之可以控制山東。徐宗偃。見《繫年錄》。山陽要地，屏蔽淮東。紹興十一年，上謂大臣曰：「山陽要地，屏蔽淮東（二七）。無山陽，則通、泰不能固。賊來，徑趣蘇（二八）、常。」《繫年錄》。自洛川下黃河、汴渠，過淮陰，一千八百三十里，順流自淮陰至邵伯三百五十里，逆流自邵伯至江九十里。李習之《南來錄》。聞

之故老，物盛人衆，足名一都會（二九）。而今擬於窮邊極塞，急則以驟戎馬，嬉則以宅狐兔（三〇）。《新山陽志》。方全盛時，北客所經從。一道自南渡門絕淮，則之齊、魯、山東，一道自淮陰放洪澤闡達淮，則入汴入洛。《新志》。

【景物上】

月榭。在倅廳。雲山。在寶應縣西南百二十里。有龍潭（三一）。臨賦（三二）。在放生池上。熙臺。在子城上。楚觀。在籌邊堂西。梁湖。《東漢志》射陽縣有——。五寶。一曰元黃天符，二曰玉雞（三三），三曰穀璧，四曰王母玉環二枚。八寶。一曰如意寶珠，二曰紅鞬鞬，三曰琅玕珠，四曰玉印，五曰皇后採桑鉤二枚，六曰雷公石二枚。清河。在淮陰縣北十里。瀆水（三四）。《元和郡縣志》云：「今謂之山陽瀆（三五），即邗溝也。舊水道屈曲，隋文帝重加修，水頗通利。」淮水。在山陽縣北五里（三六）。《水經注》云：「——泗之會即角城也（三七）。左右兩川夾翼二水入之，即泗口也。」小海。在鹽城縣，故老相傳呼爲——。大海。在鹽城縣東一里（三八）。新河。去磨盤古跡八十步。乾道中新開。邗溝。自寶應縣北流入淮。《左氏》：「哀公九年，吳城——，一通江、淮。」杜預注云：「於——築城穿溝，東北通射陽湖，入淮，通糧道。」隋大業元年，發淮南民十萬開——，自山陽至揚子入江，渠廣四十步（三九）。荆公詩：

「將母——上，留家白紵陰。月明聞杜宇，南北總關心。」羽山。崔國輔《石頭灘》詩云：「悵矣秋風時，余臨石頭灘。因高見遠望，盡此楚州內。——一點青，海岸雜花碎。日暮千里帆，楚色有微靄。」巢城。在鹽城縣北。或曰：「黃巢將窺廣陵，屯聚兵於此，因曰——。」箕山。在寶應縣東六十里。茶陂。《寰宇記》：「在山陽縣。按《淮陰圖經》云：『縣南二十里有——。』」蓼澗。在淮陰縣。檇澗。在淮陰縣。東楚。唐武德四年爲——。寶應。上元三年，以獲定國寶十三枚，因改元——。《廣記》。山陽。《西征記》：「山陽〔四〇〕，津名。」

【景物下】

籌邊堂。在郡治。輪奐甲於鄰郡〔四一〕。月波樓。在倅廳。湖光亭。在郡門外放生池上。攬轡亭。在望雲門外杏花村。著鞭亭。在城南十里。望楚亭。在水西南五里〔四二〕。鎮淮樓。在州橋之西路北。本鎮江都統司酒樓。清淮亭。在朝宗門外。如歸亭。在南市橋西。多秀亭。在芳菲亭側。萬柳堂〔四三〕。在觀豐門裏。桃柳無數。桃花渡。在山陽永豐村。杏花村。在望雲門外。竹子涇。《唐志》云：「在寶應縣，長慶中開。」櫻桃園。見《圖經》。楚元王廟下。棠梨涇。《唐志》云：「在淮陰縣。長慶二年開。」蘭亭院。在寶應縣東王野村。白水塘。《唐志》云：「在淮陰。」《寰宇記》云：「鄧艾修此塘，灌田以充軍儲。」《唐志》云：

「證聖中開，置屯田。」白水陂。《元和郡縣志》：「在寶應縣西八十里。鄧艾所立。」洪澤間。在淮陰縣東。黃莆堰。在黃莆鎮。紫極宮。在城西南隅。熙甯中楊傑爲之記。嘗有神仙留題，見仙釋門。又有李伯時畫馬，東坡有題字，陳後山有題詩。白馬湖。在寶應縣北十五里。金牛崗。在山陽縣北七十里。俗云周世宗宿兵于此。崗上亦出甘羅錢（四四），如淮陰者。石鼉城。《輿地廣記》云：「鄧艾築——，在寶應西八十里（四五）。」《郡國志》云：「有——游（四六），因以名之。」石鼉縣。隋開皇初，廢——，屬安宜縣。《圖經》：得寶河。乃尼真如所居之地，號——。河壩高敞，境物茂潤，西域胡人過其旁者莫不望其處而瞻禮焉。此事見《太平廣記》。金釵澗。在寶應縣西七十里。鐵柱崗。在鹽城縣北二里海岸（四七）。故老相傳云：「秦王繫馬柱也。」或云：「瀕海多蛟龍，畏鐵，作此鎮之。」龍興寺。唐萬歲通天中，泗州大聖曾居于此（四八）。龍竿院。在寶應東八十里射陽村。唐代宗時，寺有竹成龍形，賜額。馬娘院。在山陽縣南二十里。隋煬帝遊江都，有宮人——子歿，葬于此，因以名院。老鸛河。在城西。按《五代史》：「周世宗顯德五年至北神堰，齊雲艦大不能過，則開以通其道。」真如寺。在寶應縣治一百步（四九）。按《得寶記》云：「得寶之地在得寶河。」今寺乃後人所建。齊興寺。在寶應縣西八十里。有梁武帝讀書堂。開元寺。《劉禹錫集》有《楚州——北院枸杞

臨井繁茂可觀》詩。射陽阜。在寶應縣。阜有邱，以千數〔五〇〕，東臨射陽湖。射陽湖。《元和郡縣志》云：「在山陽縣東南八十里。漢廣陵王胥有罪，其相勝之奏奪王射陂，即此也，今謂之——，與寶應、鹽城分湖爲界，紮回三百里。」捍海堰。在鹽城縣，南接泰州海陵縣。天聖四年范文正公建議修築。滿浦閘。在朝宗門外西北四里。隆興甲申，魏勝守海州，調發兵糧由此運河至洪澤，出閘入淮。故倉城。在山陽縣。《元和郡縣志》云：「東南接州城。隋開皇初，將伐陳，因舊城儲蓄軍糧，有逾百萬，迄于大業末，常有積穀，隋亂荒廢。」故沙河。在山陽西北十里滿浦閘之西。皇朝轉運使喬惟岳所開，以避山陽灣清河口風濤之患。後蔣之奇又自淮陰開漕渠至洪澤入閘云。鹽城監。在鹽城縣。僞唐所置。《唐志》云：「有鹽亭百二十三。」《寰宇記》云：「歷代煎鹽之所。」今歲趁鹽二十七萬七千石云。南昌亭。《寰宇記》：「在山陽縣西三十五里。《史記》云：『韓信布衣，從南昌亭長寄食，長妻患之（五一），乃晨炊蓐食，飡時不爲具食，竟絕之。信爲楚王，都下邳。信至國，召亭長，賜錢百萬，曰：公小人，爲德不竟（五二）。』」北閭門。張枯有《陪楚州韋舍人——遊宴》詩〔五三〕。三阿村。按晉謝元自廣陵西屯三阿，即此地也。今屬寶應縣。三聖廟。《繫年錄》云：「金人犯楚州，趙立上城東門，敵飛砲碎其首〔五四〕，立猶曰：『吾終不能與國滅賊矣。』令舉致——中，聲言疾病祈禱，使賊不悟，言終而絕。」八里莊〔五五〕。《繫年錄》云：「紹興三十一年，通判徐宗偃《遺劉錡書》

云：「今清河口去本州五十里〔五六〕，地名——，宜遣精銳控扼。」九里徑。《繫年錄》云：「建炎四年，宗弼自六合歸屯於楚州之——，欲斷趙立糧道，立大破之。」安宜溪。《寰宇記》云：「在寶應縣西南四十里。」常豐堰。《唐志》山陽縣有——。大曆中，黜陟使李承開，以溉田。跨下橋。在淮陰縣。即韓信爲少年所辱之處。博支湖〔五七〕。《東漢志》射陽縣有——。轉般倉。在大運河西岸〔五八〕。唐漕江淮等道米，於此轉送關陝。有北神堰〔五九〕，周世宗始置滿浦閘以通水運。徐州涇、青州涇、太府涇。《唐志》云：「並在淮陰縣。證聖中，發青州、揚州民以鑿之，故曰云云。」清河口。《言行錄》云：「山陽舊屯軍八千，雷世賢請止差鎮江一軍五千人〔六〇〕。上欲許之。周必大奏山陽控扼清河口，紹興初，韓世忠嘗屯重兵於彼，若無故減戍，他時旋增〔六一〕，必致敵疑。今揚州有武鋒軍，有衆八千，本屯山陽，若歲撥三千人，同鎮江一全軍往戍，似爲兩便。」

【古迹】

都梁宮。在山陽。隋煬帝以避暑。故淮陰縣城。《寰宇記》云：「在山陽縣。又《水經注》云：『淮水東北經淮陰縣故城，北臨淮水。漢高帝封韓信爲淮陰侯。昔韓信去下邳，而釣於此處。今城北東、西二冢即信母與漂母冢〔六二〕。』」故吳城縣。《國朝會要》云：「紹興三年廢爲鎮。」又《繫年錄》云：「紹興三年十一月庚申，罷楚州吳城縣爲鎮。縣自兵火後，居民纔八

十餘家，故廢之。」甘羅城。在淮陰縣北一里。俗傳以爲秦甘羅所築。雨後常於土中得小錢，狀如鐘，有篆文，不可識，號甘羅錢。或云：「實應有甘羅廟，蓋甘羅葬於此。」韓信城。《寰宇記》云：「信本淮陰縣人，其室、冢處所並存（六三）。後受封爲侯，因築此城。」劉安王城（六四）。在山陽縣南十里。西遼城。在山陽縣東二百里。昔唐太宗征遼（六五），駐兵于此。韓王莊。在淮陰縣東北。與廟驛鋪相連，西接八里莊。自昔相傳，以爲韓信生於此。公路浦。《元和郡縣志》云：「在山陽縣東南八十里。昔袁術向九江，奔袁譚，路出斯浦，因以名之。」枚乘宅。《寰宇記》云：「枚臯宅在淮陰縣南二百步。趙嘏詩云：「家在枚臯舊宅邊（六六）。」即此。」劉伶臺。在縣北邊淮（六七）。杜康橋。在劉伶臺南。梁武帝讀書臺（六八）。在寶應縣齊興寺。英烈王廟。在朝宗門外北神鎮西。伍子胥廟也。唐狄仁傑循撫江淮，毀淫祠千七百所，唯留吳太伯（六九）、季札、子胥三祠。漢高帝廟。在淮陰（七〇）。《寰宇記》云：「惠帝九年（七一），令諸侯王立高祖廟。」今猶存。鍾離相公廟。在山陽縣南七十里。故老相傳：「項王將鍾離昧亡歸韓信，詔捕之，急，昧自剄，土人哀之，爲立廟于此。」淮陰侯廟。東坡先生爲廟銘曰：「書軌新邦，英雄舊里。海霧朝翻，山煙暮起。宅臨舊楚，廟倚清淮。枯松折栢，廢井荒臺。我停單車，思人望古。淮陰少年，有目無覩。不知將軍，用之則虎。」楚元王廟。在

市橋南。《九域志》云。東海恭王廟。按東海恭王嘗立爲皇太子。母郭氏廢，封東海王。山陽非所封，而威靈所及之遠若此。董永廟。《九域志》。甘羅廟。在寶應。顯忠廟。在清風門裏。建炎間知州趙立祠也。敵入寇，立盡力禦之，中砲而死，城遂陷。詔贈奉國軍節度使，謚曰忠烈。墓在北神鎮壽昌寺南。褒忠廟。在朝宗門裏。《七二》。隆興間知州魏勝祠也。隆興二年，自海州移守楚，敵入寇，勝單騎入陣，死焉，贈甯國軍節度使，廟曰褒忠，謚曰忠烈。趙康州徐夫子廟。徐積，楚州人。《七三》。嘗從胡安定學。登第，不忍去其親，就除揚州司戶、楚州教授，主鄉學者三十年。東坡、山谷諸名士皆尊事之。丁內艱，廬墓，致甘露之祥。其後郡守苗仲淵於郡圃圖先生與趙康州祠之，並作詩以美之，曰：「世惟忠與孝，訓俗知所止。殺身趙康州，錫類徐夫子。雖非萃一門，死葬同閭里。」石臼神祠。紹興三十一年，金人渝盟，李寶自海道禦之，至石臼山，禱之于神，俄而風順，縱火焚敵舟略盡。寶上其事，詔封神曰佑順侯，廟曰威濟，就本州立廟。四祠堂。在州學。學舊有趙康州、徐節孝塑像，增立張右史、陳忠肅兩畫像，東曰忠孝之祠，西曰文節之祠。古山陽土地廟。在子城西。像設冕服如王者。《舊志》云：「故老相傳漢獻帝也。」按《魏志》：「黃初二年，以河內邑萬戶奉漢帝爲山陽公。」乃河內郡之山陽縣，非此山陽也。或曰山陽人僑寓，因爲立廟。公冶長墓。《九域志》。漂母墓。《輿地廣記》在淮陰縣。《九域志》同。袁術墓。在寶應縣南三十步。程璣金墓。在城東。韓蘄王